

Imani na Ahadi za Mungu

Tazama, roho yake hujivuna, haina unyofu ndani yake; lakini mwenye haki ataishi kwa imani yake. Habakuki 2:1-4.

Wakati Yosia alipoanza kutawala na kwa miaka mingi kabla ya hapo, watu wenye moyo wa kweli katika Yuda walikuwa wakihoji iwapo ahadi za Mungu kwa Israeli ya kale zingeweza kutimizwa....

Maswali haya yenye shauku yalitolewa na nabii Habakuki. Akitazama hali ya waaminifu katika siku zake, alionesha mzigo wa moyo wake katika swali: “Ee Bwana, nilie hata lini, wewe usitake kusikia!” ... Kisha imani yake ikifikia ng’ambo ya mambo ya kuogofya yanayoelekea kuja katika wakati ujao wa karibu na kushikilia kwa uthabiti ahadi za thamani zinazodhihirisha upendo wa Mungu kwa watoto Wake wanaomwamini nabii aliongeza, “Hatutakufa.” Kwa tamko hili la imani aliweka suala lake na lile la kila Mwisraeli anayeamini, mikononi mwa Mungu mwenye huruma....

Imani ile iliyomtia nguvu Habakuki na watakatifu na wenye haki wote katika siku hizo za majaribio makubwa ilikuwa ni imani ile ile ambayo inawategemeza watu wa Mungu leo. Katika saa zenye giza kuu, chini ya hali za kuogofya mno, muumini Mkristo anaweza kuiweka roho yake ikiwa imeegemezwa juu ya chanzo cha nuru na nguvu zote. Siku baada ya siku, kwa njia ya imani kwa Mungu, tumaini lake na ujasiri vinaweza kufanywa upya. “Mwenye haki ataishi kwa imani yake.”...

Ni lazima tuthamini na kuikuza imani ile ambayo manabii na mitume wameshuhudia juu yake—imani ile ambayo inashikilia ahadi za Mungu na kungojea ukombozi katika wakati na njia Yake aliyopanga. Neno la unabii lililo hakika litafikia utimiaji wake wa mwisho katika ujio wa utukufu wa Bwana na Mwokozi wetu Yesu Kristo, akiwa ni Mfalme wa wafalme na Bwana wa mabwana.... Pamoja na nabii ambaye alijitahidi kuwatia moyo Yuda katika wakati ule wa uasi usio na kifani, hebu na tuseme kwa ujasiri, “Lakini Bwana yumo ndani ya hekalu lake takatifu: dunia yote na inyamaze kimya mbele zake.” Hebu daima na tuweke katika kumbukumbu ujumbe ule wa kuchangamsha, “Maana njozi hii bado ni kwa wakati ulioamriwa, inafanya haraka ili kuufikia mwisho wake, kwa kuwa haina budi kuja, haitakawia....